

四庫全書

集部

欽定四庫全書

蘇魏公文集卷十七

宋 蘇頌 撰

奏議

論前代帝王追尊本親及嗣王公襲封故事

漢宣繼昭帝即位詔議故皇太子號謚園邑有司奏請
故皇太子宜謚曰戾史良娣曰戾夫人置守塚三十家
園置長丞親史皇孫謚曰悼親謂父也母曰悼后比諸

侯王漢諸侯王母夫人皆曰后園置奉邑三百家後八

歲有司復請悼園宜稱尊號曰皇考立廟因園為寢以

時薦享戾夫人曰戾后皆益奉園民光武中興上承元

帝建武二年以皇祖皇考墓為昌陵

後改曰章陵縣

置陵令守

視

皇祖考不加尊稱皇考仍舊稱南頓君

十九年尊宣帝為中宗始祠昭

帝元帝於太廟

前此十一帝主皆納高廟

成帝哀帝平帝於長安春

陵節侯四世以下於章陵

節侯光武之高祖

東晉元帝由琅邪

繼統即位之後以父恭王無他子立皇子裒為琅邪王

奉恭王祀其後王薨琅邪皆更立王終晉王世前代帝
王自諸侯入奉大統尊其本親不失禮者三帝也宣光
於其父祖惟塋墓置園邑令丞所以異於諸侯也而不
加尊稱不封國邑尊本恭親之義也

不加尊稱尊正統
也不封國邑子無

爵父之義也文雖不著其
義可推也亦見於師丹議

其曰親曰皇祖曰皇考者有

司之失也何以言之父祖之尊不容改更稱謂但以上
承大宗不得復顧其私恩故服有除降而名無異稱儀
禮喪服傳齊衰期為人後者為其父母師丹議亦曰降

其父母期所以云者取其別於他親於義無嫌也今不
曰父而曰親而於九族旁宗尊卑無所別異於義安乎
不別加稱謂直曰史皇孫則中外無嫌尊卑之義自見
也至若皇祖皇考之稱是天子諸侯大夫士奉祭祀之
文禮記祭法曰王立七廟一壇一墠曰考廟曰王考廟
曰皇考廟曰顯考廟曰祖考廟鄭康成云王皇皆君也
顯明也祖始也名先人以君明始者所以尊本之意也
若是則豈可稱於羣臣論議之間乎故宣帝詔直曰故

皇太子是也然則考與父豈有別乎禮記曰生曰父母

死曰考妣

郭璞注爾雅不取此義然則學者當從禮記為正

白虎通曰父矩也

以度教子者也考成也言有成德也廣雅云母牧也言
育養子也妣嬪也匹於父也曰教曰養親親之辭也曰
成德曰匹父尊之之辭也故禮有世父母叔父母之文
而無世考妣叔考妣之說此其所以別也宣光之世議
者不能推本此意以開導時主使盡禮意故曰有司之
失也晉元帝雖越在江介而能定其大義不失統紀者

以當時諸儒若賀循輩非一皆有禮學國爵詳正本末
不違越於先代不致譏於後世誠有由也先帝紹位之
始深惟其故追責宗室諸王獨國爵濮安懿王無所加
進崇奉之禮不過置園陵立國廟而已此合乎宣光尊
本恭親之美也初議稱親後亦罷寢特封王之子為濮
公使世世奉祀以正其國統此又德過於二帝區區晉
室不足擬倫也

光武為皇考南頓君立後後世使羣臣
郡國奉祀此師丹所謂無主不正之禮

是也袁安桓尊其父祖為皇而使王子孫奉祀此失禮
之大者也其尊曰皇者禮如天子天子不敢臣之高祖

之於太上皇是也今使諸侯羣臣奉祀神不歆非類皇
豈得享之哉故三代所以尊王者後待以不臣得用其
國之儀物服色祀其先王者為此也唐立孝敬皇帝奉
天皇帝廟京師皆有司行事追尊讓皇帝以其子孫為
嗣寧王奉祀事亦因循前代之失也今欲因改封故王議追尊之禮莫若

增陵廟以奉園之戶加本國以嗣王之名既合於古義

又不違先帝之本意也先帝不追尊仙游縣君益見聖

慮之深遠也

魏明帝詔曰哀帝以外藩援立而董宏等
稱引七秦惑誤時朝既尊共皇立廟京都

又寵藩妾使比長信僭差無度人神弗祐其令公卿有
司深以前世行事為戒是哀帝一失禮取誚後來本欲
尊親反詔重毀如是豈得為孝乎東晉孝武帝太元中
崇進所生母為太妃范甯亦曰子不得爵命其母妃是

太子婦必也正名寧可稱母

今議尊崇謂許其所生宗室子援羣臣

封育母之例請加封號朝廷以誕育先帝之故優詔褒

述特進大國既緣宗室之請則不失正禮推以先帝私

親則其他宗室不敢為比亦可以成先帝之志也

或嫌爵母

則母濮國以為號可也

論王公封爵故事

唐令王正一品嗣王郡王國公從一品貞元二年五月

勅御史中丞竇參等奏文武官辭見宴集請依天寶三

年禮部詳定勅親王嗣王任卑官職事仍依王品郡王
任三品以下職事者在同階品上自外無文武官者嗣
王在太子太保下郡王次之國公在正三品下郡公在
從三品下縣公在正四品下貞元四年五月勅御史中
丞竇參等奏文武官辭見爵雖高官或下列於上官之
上非制也自今以後宜列於本官班之上貞元二十一
年五月勅御史臺奏准公式今諸文武官朝參行立各
依本職事官品為序緣有檢校官高職事卑及嗣王郡

王任職事官高卑不等今請應檢校僕射及尚書以上

及嗣王郡王任職事官者一切在職事本品之上

已上書見

禮閣新儀國朝故事惟親王恩禮優異外餘郡王嗣王國公

郡公縣公皆無異禮惟立班在本官之上又唐諸侯王

薨子得襲封為嗣王

永徽元年濮王泰薨立其子欣為嗣濮王垂拱初章懷太子賢薨授

其子守禮太子洗馬為嗣雍王

嗣王薨子皆襲封

嗣韓王納官至員外祭酒卒以其子璩為

韓王國子員外司業

有不襲封者

嗣曹王皋薨子道古為朝官不襲封

有降爵為公

侯者

荆王元景坐法貶死追封沈黎王以渤海王子長沙嗣仍降為侯嗣楚王靈夔薨子福嗣降爵為公

有初但為嗣後數年乃封嗣王者

嗣舒王津天寶二年卒子藻嗣至天寶九

載封嗣舒王

有由嗣王而遷郡王者其帶職事官有為國子

員外祭酒司業者

韓王納并子璩之類

有加銀青階者

景龍四年嗣鄭王希

言等一十四人並加銀青光祿大夫

有為諸衛將軍者

嗣霍王暉開元中左千牛員外將軍

有為員外洗馬者

嗣徐王茂卒子延年除員外洗馬為嗣徐王

有為宗正卿

及州郡上佐官者

此例最多不可悉數

皆出朝廷一時之命即無

定制

其恩禮厚薄以封戶多少為限中葉以後封戶皆為虛名今所不用

本朝未有嗣王

之號若欲封拜謂宜先委禮官及兩省參詳定制然後

行之

奏乞將常平倉等公事付逐路轉運司其提舉官
改差充本司勾當公事

臣竊聞議者以謂諸路俵散青苗錢侵害人戶中外臣
僚數有論奏皆曰不便臣等見主判司農寺青苗文字
多由本寺行下竊尋先降勅意本欲優民公家無所利
其入今乃人情不安論議如此臣等訪聞得蓋是逐路
提舉官不能上體朝廷之意務要張大其事州縣畏懼

承稟不暇是致民間不能無煩擾之弊且人戶所信者莫如州縣州縣所稟者獨知監司今提舉官逐路自置一司與轉運提刑既不相管攝文移往復其間事有異同則州縣莫知所稟此是非之論所由起而人情不得不驚憚也今言不便者既衆朝廷業已遣使未見灼然利害不欲遽罷若執而不變誠恐中外喧騰無有已時臣以為緣事增損莫若以常平廣惠倉農田水利差役利害等事一切付之逐路監司其提舉官改差充轉運

司勾當公事名目凡有興置事件並須咨稟轉運使度
可否施行其今年秋料青苗錢亦委轉運司候收歛得
夏料錢斛了畢日與州縣當職官同共商量體當民間
物力有餘易為輸納委實利便方得俵散若或民力不
易難以勝任即且止住將來春首別行相度如此則事
有統一人無異論更張之際於事體亦無所損也

議武舉條貫

臣等昨奉勅差考試武舉人伏覩條制有未盡事理今

具起請如後一策論武藝俱優者為優等今定弓射一石一斗力馬射八斗力各滿不破體及使馬精熟臣等竊以唐制定舉人簡試長垛馬槍步射穿札翹關負重身材通取五次上者為及第長垛以箭十隻為限弓用一石力箭重六錢以箭入暈多少為等第長槍以刺中木人上版子為等第步射取把捉如法弓矢鳴快并二十步內穿鐵甲者為中等馬射弓七斗力取射中鹿子者為等第翹關者限十舉以上負米五石行二十步為

中等身材長六尺為上五尺八寸為次其箭有不入暈
及槍關不中等者亦得通計折除蓋科目如此之衆較
試如此之備所以收取材武之人緩急有可任使今制
但取箭滿不問中否又無長槍翅關負重射札之科誠
慮舉人中有材藝者別無條目收錄較試之際未免遺
材竊謂其餘條目恐難卒復惟射親命中之法於今取
人最為要急臣等欲乞於此條下添入如有步射弓一
石力十箭俱上子垛六箭以上入暈馬射八斗力三箭

俱中笋椿並為藝優步射十箭八箭以上上子垛四箭
以上入暈馬射兩箭中笋椿為藝平以上除發箭不去
及不跌垛出垛者便行黜退外若箭去上垛雖些小不
為不合格並與馬步射通計入暈及不上子垛不中笋
椿箭數相折除考較外依得今來所請射中箭數為入
等其垛子廣狹高下遠近射帖方圓大小並以今中軍
之制為定一策優藝平者為次優今定弓步射一石一
斗力馬射八斗各滿但一事破體及使馬生疎臣等竊

詳下條藝優策平定步射一石力馬射七斗力各滿及使馬精熟為次等今策優藝平條却無此一等弓馬設有策優而射得此步射一石馬射七斗力弓馬者以條無明文便行頒降為藝優策平正相背蓋欲乞於此條下添入或步射一石力馬射七斗力各滿及使馬精熟與前項陳請射親步射四箭以上入暈馬射兩箭中筭椿者並為優互相考較一藝優策平者為次等今定弓步射一石力馬射七斗力各滿及使馬精熟臣欲於此條

更添入或步射一石一斗力馬射八斗力各滿但一事破體及使馬生疎者與前項起請射親步射四箭以上入量馬射兩箭中笋椿者並為次等互相考定一策藝俱平者為末等今定弓步射一石力馬射七斗力各滿但一事破體及使馬生疎臣等竊詳上項所定弓馬兩等並以箭滿為合格其間或有前箭俱滿但後箭把薜便為不合格如此誠恐有武藝之人偶然一箭蹉跌便被黜落深可嗟憫欲乞今後有射第一等弓馬箭有不

滿非全然開拽不得者如情願更試第二等弓馬亦聽
若合格便依本等收錄及更與前項起請射親步射四
箭以上入暈馬射兩箭中筭椿互相考定一策略雖下
而武藝絕倫者未得黜落別候取旨今定弓射二石力
弩踏五石力射得臣等欲乞於此條下更添入或弓步
射一石一斗力十箭八箭以上入暈弩踏三石力射十
箭俱入暈者並為武藝絕倫別奏取旨一策下藝平或
策平藝下者並為不合格臣等竊詳條意既言策下藝

平或策平藝下者為不合格是策優藝下策下藝優者未為不合格今來兩次考試除武藝絕倫者自許陳狀就試別奏取旨外其策優藝下者別無明文收錄是致一例退落及策在下等者既不關送步軍司其中雖有武藝之人無由得預呈試弓馬欲乞今後將所試策考定雖在下等但非文理全然紕繆不答所問別引外事及雜犯不合格者並許一例關試弓馬如弓馬在優等策雖在下等者並許比其策在優等而量試武藝步射

馬射各只一箭不滿或把齊附末等收錄者亦許別奏
取旨如此則取士之路稍寬而習學之人知所激勸也

奏乞專差官開修府界至京溝河

公治平元年上
此議四年京城

大雨溝渠壅滯道途水深
數尺始務開修遂無水患

臣昨奉勅就差體量災傷壁畫疏導積水竊見京畿縣
界多是溝河阻滯決泄水勢不快雖逐年檢計開浚然
以河道數多夫力有限無由盡料應副是致頻有水患
兼臣相度得近京城汴河以南諸水多入自盟圭河汴

河以北諸水多入白溝河京城西北縣界諸水多入刁河上件溝河四道決泄諸水最是緊急見今例各淺狹合行先次開淘兼為地步遼遠連接京東西淮南地分甚多若非大興夫役無由集事臣昨曾奏請乞下都水監指揮與諸路同共計料已蒙行下除本司檢定畿內定步合計四百二十萬七千餘工外諸路未應開今准朝旨府界諸縣溝洫河道權住興修候來年另行檢計差夫開修臣再詳四河檢計夫料不少若將來只依常

年例量差人夫應副竊恐虛費工力無由除去水害臣
今擘畫欲乞朝廷特賜選差有心力知水利朝臣使臣
各一員或即委都水監奏舉使專管勾開修上件溝河
四道仍令預行計度夫料至時先且逐一道自下流至
上源併力開淘如一年人夫未得了當即候次年接續
開修以次道興役若三年以上了當即與理一任差遣
五年以上與理兩任仍候住役日別差官重行檢視如
委是依得元料及經霖雨別無阻滯其差去官即乞優

與酬獎若稍不如法并依前更致水患即重行責罰其餘溝洫只乞令都水監提點司逐旋相度委自本縣量差夫力漸次興修如此必大段分減得京城水勢久遠不復為患

論胡俛罪名

臣等伏見前尚書度支員外郎充集賢校理胡俛昨因解賓王論告先知登州日將斫伐到解字內桐木製造籠子入已坐監主自盜法計賊不滿一貫文遂至停廢

竊聞俛被劾之日曾攀援法寺斷例有廨宇內斫竹賣錢入已者只作收到地利並不書罪及有依前官言說將賣公使菜園錢入已者只作誤認官私財物罪名定斷兼稱賓王自是前任知州其所論告顯非干已而有司拘文卒從深坐情輕法重衆所嗟憫棄置散地已一年餘後來聞有近臣為之奏雪乞朝廷原情特與叙用臣等竊以俛久在儒館累歷差使數有臣僚論薦觀其操守固非貪猥之流昨者所犯蓋以失於周防至為仇

人据摭文致其罪無由自明然比之斫竹貨賣及收公
使課利之人過亦未大况賓王本是登人與俛結怨非
一朝昨因待闕還鄉日久求俛過失無所不至惟得伐
木一事足明俛之當官別無他惡徒以賦性狷急不能
容物致與賓王不協終為所訟此俛之短不得無過從
而廢棄抑又甚矣臣等以謂法禁之設所以防奸萌而
抑澆敝自俛坐罪怨仇得志增長偷薄無甚於斯豈朝
廷用法之本意耶臣等欲乞將俛元犯因依及攀援體

例詳酌情理早賜牽復足以彰治朝之寬典懲好訟之薄俗也

同兩制論祖無擇對獄

臣等聞古者命夫命婦不親坐獄蓋不使始嘗貴者與徒隸辨訟所以養廉恥而崇禮節也賈誼曰廉恥節禮以治君子故有賜死而無僇辱是以黜劓之刑不及大夫以其離主上不遠也又曰古者大臣有坐不廉而廢者不曰不廉曰簋簋不飭坐污穢淫亂者不曰污穢曰帷

薄不修坐罷軟不勝者不曰罷軟曰下官不職故貴大臣定有臯猶未斥然正以呼之尚遷就而為之諱也古之所以待士大夫一以禮義如此之重也國朝推鞠之制命官犯賊罪亦先勘干連人證驗分明方得追攝其餘有犯如事狀明白三次拒抗即勒令參對是一命以上犯罪與庶民法有等差若其職列貴近主上嘗所加禮以待之者誠宜寬其容繫以存事體也近聞龍圖閣學士祖無擇昨知杭州日有不公等事發已降勅命就

秀州置院推勘仍差內臣押伴往彼竊以無擇郡政因循自詒物議固當窮治以警具官然以遭遇三朝擢在近列出典藩服案轄一道罷郡未久一旦有罪便與嘗所統臨羣吏辭對曲直不惟彼處吏民聽望不足抑於朝廷事體頗有虧損嘗聞祥符中樞密直學士邊肅知鎮州日以公費錢貿易規利又令部吏強市民羊及買女使王嗣宗以其事聞真宗皇帝以肅居近職不欲屬吏特命劉綜任中正以嗣宗奏示之肅即引伏遂坐貶

官嘉祐中觀文殿學士孫沔知杭州日在任不法諫官御史交章論列仁宗皇帝止令本路體量得實而黜之翰林侍讀學士呂溱知成德軍日侵用公使本路追劾當時不令溱就鞫直行責降今無擇所犯未甚於此三人者仍該今來德音自非賊污盡當原減而不候取問便令赴彼對獄其為頓辱甚矣況已有御史章奏制院可以依憑根究不必親令即訊然後當罪也臣等欲望聖慈以無擇職在近列嘗為本路案轄之官特許免赴

秀州制勘只令淮南州郡聽候指揮俟彼獄具日朝廷據案就問引伏即依例責降如其抗拒自有常法如此足以彰聖治之朝待遇臣下進退以禮免令州郡長吏虛被困辱在於朝體抑有裨助也

奏乞今後不許特創寺院


臣近主判尚書祠部竊見天下寺院宮觀計三萬八千九百餘所日近又賜三十間以上無名寺院以壽聖為額者二千三百餘所其間勘會未到及不滿三十間者

仍不在其數而大臣節將又例得以看墳為名陳乞修
建者無歲無之且建一寺院便須增置莊田營造舍宇
崇飾堂殿及修設齋供僧徒從而緣化鄉村不能無困
擾之患兼臣訪聞得鄉村無名寺宇所以衆多者始由
僧徒緣化造屋數間謂之佛堂漸次增添不數年間便
成院宇次第歲月既久州縣不能窮究因依或遇朝廷
推恩因指為古跡為之保明奏報一蒙賜額則永為僧
居矣臣嘗閱奏籍其間甚有屋宇七八十間而看守僧

徒止於一二人者莫非安處廣居坐享良民之供饋天下之人共知其敝而不能去竊謂民之財力土田有限而僧徒貲費無涯以有限之物而供無涯之求若不禁止竊恐更三五十年民被其患轉不細也臣伏見永昭永厚陵並只增葺永定舊院別無興建寺宇此誠聖意所慮者遠而臣僚及民間反無制限此有司之失也臣欲乞朝廷明立條約今後不許特創寺院宮觀其經今來已賜聖壽名額外所有不及間架去處並令州縣檢

括指揮一切毀拆其土田元是百姓稅地即令給還本
主若係官地亦行沒納許諸色人收買請射永為己業
其臣僚之家例合賜院額者並許指射有名寺院僧徒
看管墳塋仍依舊例一年或間年與剃度行者一名充
為恩澤若去墳側近無寺院者即與依前代守塚之制
差本處末等鄉貫戶永充看管墳塋人數即隨品秩高
下仍與免戶下諸般色役若被差之人經久家業增進
合陞入上等者即與改差下等人承替如此稍可以革

創寺之弊又於大臣墳塋別無虧闕惟朝廷裁幸



蘇魏公文集卷十七

欽定四庫全書

集部

蘇魏公文集卷二十一

十八至

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣沈清藻

謄錄監生臣黃臣鵠

欽定四庫全書

蘇魏公文集卷十八

宋 蘇頌 撰

奏議

請增葺尚書省稍復南宮故事

臣竊以今之尚書省古之天臺朝廷萬事之本皆由此
出其地莫重焉國朝因五季更置事歸三司者十六七
歸諸司者十二三自茲視文昌為閒地矣雖然官次置

位網領猶存憲章典型規模可見曩者仁宗世嘗有大臣建言請移審官院歸吏部三班院歸兵部審刑院歸刑部庶幾稍近古制而當時議者不深維其本苟憚興作卒不克行誠可惜也臣累曾主判本省閒曹備見其事八座六行皆崇堂華構比其他官守最為雄麗但以累年以來頻經霖潦棟宇隳頽不庇風雨縱或官中檢舉支破材料修葺而本省並無都總監臨之人只憑看守剩員及門卒等催趨以此動經歲月不得了畢切

緣其間官物庫屋固不為少又有吏兵刑禮諸部簿書充積廊廡因此損壞散失者亦不可究知矣臣以謂向之議論移置官司恐未暇及則欲乞朝廷再賜相度增置朝臣或使臣兩員專令勾當本省公事及監門仍每夜輪一人押宿三年一替與當親民任使應本省簿書官物屋宇並令逐時點檢稍有損壞即供舉修葺仍便臨督工匠及收支材料直至了畢如遇貢舉亦可以一就充監貢院門所貴振舉綱維鈐束官物不至損失俟

其歲月浸久完葺有緒然後議移審官等三院還省則南宮故事可舉而行一代典章於斯為盛矣

請重修纂國朝所行五禮

臣竊惟方今聖治日新百度修舉其在朝政固無可措言者然詔旨開納不容自嘿輒敢以平昔所懷一二狂瞽仰塞明詔臣伏見國朝以來制作禮樂上采三代下迄有唐損益節文簡冊具載而前後禮官纂集類無法制或直載一時所行或雜案牘歲月條目相錯本末不

倫臣竊考之六經在禮有三種之別周官著有司典領之事儀禮載升降隆殺之節戴記叙古今因革之文雖聖賢作述之不同而語其歸趣實相為表裏也後世言禮者皆不出此三體漢晉洎隋雖代有作者而苟簡一時法制無取唐明皇命學士等因貞觀顯慶所修五禮討論刪改集成一百五十卷是為大唐開元禮行於累朝設於科舉傳其學者則有義鑑義羅之類比於近代之書最為詳悉故今世漢晉洎隋皆無傳而開元禮獨

不廢者以其法制存焉故也太祖皇帝特詔儒臣劉溫
叟盧多遜扈蒙等祖述其書傳以今事仍加增損足
成二百卷是為開寶通禮又有義纂一百卷以發明其
旨要仍依開元禮設科取士逮今官司遵用斯為不刊
況之六經儀禮之別也然此特一經也在於有司典領
之事古今沿革之文猶闕而不立故舉行之際尚或未
備自開寶以後百年之間累聖躬行聲明寢盛非有繼
述後世何觀嘉祐初太常歐陽修奏請編撰彼時臣任

博士職預纂修嘗以恭謝一門分為三目其一自降御
札公卿百司奉行辦備之事謂之有司其二自前期陳
設至裸獻禮畢謂之儀注其三采古今曲臺論議更創
之制謂之沿革以此一門為例他悉倣之修已議定具
草會臣罷禮官領他職復奏姚闢蘇洵繼掌其事闢洵
離析舊文更立新體撰成一百卷是為太常因革禮雖
號簡要幾同鈔節姑可以備有司之檢閱誠未足以發
揚聖朝制作之盛也臣伏覩陛下留意典章修舉廢墜

前歲詔命近臣詳定禮文自郊廟至於羣臣朝會與夫燕享器服之名數舞樂之形容考古揆今審定至當皆三代之所放失漢唐之所闕遺斷自清衷舉行殆遍固當著於典訓與六經並行為萬世矜式也臣不勝願幸欲望再命諸儒討論國朝以來自開寶通禮至近歲詳定禮文以有司及儀注沿革依三禮隨類分門著為大宋元豐新禮付之太常頒於學官使博士弟子講習大義或施之科舉則數歲之後必有詳練疏通之人上副

拔擢可以為朝廷講議之官庶幾天下向風皆知禮教
謙恭撙節不學而能於變時雍可跂而待也

請別定縣令考課及立鄉官

臣竊以國家恃以為治者民也使民敦本而趨善者縣
令也是以前世論政者莫不以此為首務鄉者仁宗皇
帝深知其故始詔保任縣令歲復增考課之法其所以
責任求治之意至矣然而縣邑之間卓然以治理之効
聞者猶寡臣竊思之蓋以殿最之格不過校簿書案文

法而已故簿書益密而編戶益擾文法彌具而治道彌遠是豈朝廷任官責效之本意耶且古之治民勸導教率無所不至故孝弟力田有優異之科三老廉吏有表率之義由是農民衆而土田闢風俗厚而獄訟稀今則不然民勤於力苟致贍足則懼外遷第等遂有因循不耕之患是力田者有累而惰遊者無罰也父子聚居丁產稍多則懼差徭配率遂有離析異居之弊是孝弟無所勸而奸惡未得止也鄉村但有耆壯巡察吏卒追捕

不聞以善道諭之者是教化無由至而獄訟不得息也
然則欲變其俗使稍敦本者亦在朝廷勸勉之而已臣
欲望明詔戒勅自今考課以令長能用善道諭民勉末
游而歸本業致獄訟稀簡而盜賊衰息者為優等其能
校簿書均移稅賦發奸捕盜興利除害者為次等二者
咸無為下等優等望賜超擢次等再加激厲末等自當
降黜其田里之民亦許令長舉察州郡案覆立為科條
有能盡力畝畝開墾陂澤久遠為利於衆者或羣居孝

友宗族敦睦為鄉黨所推者如此之類特與蠲除戶下
差役其復有明於義理年高行著者即少加旌異或立
鄉官之號以賜之使人諭教化於下相率而歸於善道
如此則廉平之吏思盡所長禮義之風庶幾可致

奏乞初出官人乞不許差充簽判

臣伏見頃年累遣使者寬恤民力減定衙前人數此誠
朝廷惠綏元元之深意也而議者多謂自改定以來空
閒人戶甚蒙休養見役之人轉見困匱臣累受外任備

見其事蓋以衙前雖減而役事仍舊以二人之力舉三
人之事不待言而後知其勞矣且州縣色役固有常規
不可頓闕欲恤其困者莫若為之擇主轄之官也夫主
轄之官一非其人則差使優重不得均濟優重不得均
濟則有罄竭物產不能了一次色役者以此言之擇官
不可不慎也臣竊見近年以來補蔭官例合陳乞差遣
者雖初任及監當資序便得指射權注簽書州軍判官
公事其間或有全未歷事之人衙司條例既多不能一

一通曉利病大則奉上官顧指不敢違忤次則為姦吏欺結莫能窮究遂使鄉戶受敝無所控愬朝廷雖有惠恤之恩何由下達耶臣欲乞今後初官或監當資叙之人合該陳乞者只許指射本等優便差遣不得更乞權注簽判親民之職及初受恩澤幕職官亦只得注授以次職事官其簽判判官係主轄衙司者並令審官院并流內銓選差經事有舉主之人注受此亦寬恤民力之一端也

奏乞春夏不斷大辟

臣伏思國家以仁恩被冒天下祖宗慎用刑辟陛下丕承謨烈憲章大備輕重得宜上自朝廷下及州縣遵守條詔無有違者雖杖笞之責不合法令未嘗輒行其已斷之獄猶加審察官司縱出者坐罰深故者或至廢黜而不用臣嘗謂自堯舜以來經史所著用刑詳慎未有及我朝之仁恕平允者也惟論決重辟猶不以時而議者未嘗及之誠恐亦為聖世當行之一事臣愚竊不識

大體故敢以前古之說言之傳曰賞以春夏刑以秋冬
是三代之時春夏未嘗行誅殺也史載秦世四時行刑
王莽盛夏殺人是皆譏其虐政也漢制斷獄報重常盡
三冬之月蓋不於陽盛之時勦絕生類所以協天意助
人情也東漢以後或行或否近世遂廢而不舉其說蓋
患囚繫之淹久耳臣以謂獄官案鞫苟有連逮不以輕
重追呼參驗動涉歲時未嘗以淹久故釋而不問也臣
愚欲望聖慈參酌古義采周漢詔天下獄囚自非惡

逆以上決不待時外其餘衆罪並俟秋冬論決免當溫
煦之日而有愁痛之聲亦足以成聖朝仁恩之美也且
無知之民輕犯刑網殺之為可矜貸之為廢法萬一待
決踰時或遇恩降得從末減是陛下不廢法而全人命
者多矣恩威並行民知畏愛是當天心感召和氣誠太
平之高致也

奏乞京畿諸縣分屯禁軍

治平元年上

臣伏以周制六軍蓋出六鄉之衆在王畿四郊之地唐

設十二衛軍亦散布輔畿郡縣又以關內諸府分隸之
皆所以臨制四方為上國藩衛也國朝禁兵多在京城
又畿內東南諸縣雖於糧運供饋為便而西北兩面武
備或闕況中牟長垣兩縣直都門要衝之路二陞驛置
皆由此出而舊不屯兵至於城守防轉居常乏人臣以
為各可創置三五指揮又東明考城兩縣界與東京州
縣相接素名聚寇之所雖有軍營其數甚少臣亦以為
各可添置十數指揮欲乞朝廷委所司相度於京畿兵

多處以新近招揀補填未足軍分移屯逐縣其未足人數候到彼處逐旋招填應營房所須土木材用即先委本縣預行計置俟壁壘已具然後移軍往彼其衣糧錢帛除東明一縣自可於廣濟河轉漕供給外中年等三縣即乞將隣州接縣夏秋稅賦自近及遠以次支移就彼送納充贍取足或謂諸縣近經災傷未宜遽起役事即乞先且標置營地逐一指揮旋行修葺不三二年亦可辦集如此則不惟畿縣有備亦所以增上都四面之

形勢也

請重議加役流法

臣聞曩歲嘗有議者欲復肉刑將以寬減重辟而以此法久廢難以猝行又聞頗患配隸之人轉徙遠方監驅促迫經涉寒暑強者有奔亡之虞弱者有疲羸之困思革其弊宜求厥中昔漢文帝感一女子之言而制髡鉗代肉刑則有城旦鬼薪司寇之差唐太宗納裴洪獻之議而立加役流代斬趾則有三歲居作之限今欲寬省

嚴誅又閹配隸轉徙之勞臣愚以謂莫如重議加役流
法取當黥代者依條斷罪髡髮鉗足晝則居作夜則置
之園土實滿三歲然後釋之中間雖逢恩宥未滿歲則
不在原免之限其初釋放者仍送所居鄉貫譏察其出
入又三歲不犯故為之罪乃得聽從便其無鄉貫者隣
近州縣拘管譏察如前雖有兇頑之人而更三歲勞役
之苦且足以懲艾矣復有鄉保譏察之嚴又足以戒懼
也如其性實兇暴放釋之後不知悛改復為人患則誅

之可也投之四裔可也如此措置不惟省遠道奔亡之患又足以開其自新之路化暴惡為良民使愚俗知教化亦省刑止殺之一端也臣才識短淺不周世務姑奉詔旨勉強罄竭所見如此非敢謂是然禮刑之論實繫朝廷事體伏望聖慈寬其罪戾特賜裁擇庶幾塵露少裨山海

奏乞今後衝改條貫並委法官詳定

臣竊以國家承平百年遺文墜典罔不修舉固已跨越

漢唐規模宏遠矣而於法令之間猶有所未盡者豈非前後論議之臣不能推原其本苟徇一時之便遂著而為令後之有司用之小或乖戾又復更易是致朝廷憲章未得一定夫聖王之法欲其簡約而明白使人易避而難犯然後垂之久遠為不刊之典如唐之十二律本朝之刑統是也雖歷數百年其間勅條之更改者多矣而二書獨不廢者以其得簡明之意故也自編勅之興號為繁密而中間衝改率不過一二十年又復重定蓋

文繁則易攻事密則難悉只如嘉祐編勅頒行未數年而續降散勅又增於前日以此無知之民至有輕犯於法舞文之吏得以高下其手其弊蓋在乎更改不常耳臣去歲任淮南轉運使日承准三司行下當年九月三日中書劄子為據江西轉運司及江淮發運司起請虔吉等州新船借裝一運上京山東排岸司等處不得擅行截撥條約一道計四千七百餘字臣看詳大抵只是約束不得截撥新船往不係指定路分則編勅已有留

納州府違之者自當嚴斷矣其添入兵梢等候合納處
朱鈔回歸梢工科違制兵士嚴斷若是創立上項刑名
只當於本條下添入此一節可矣不必具載行遣使州
郡煩費抄錄若欲出榜曉示則數千餘言有司看覽尚
或不悉豈庸愚兵卒能盡曉耶以此言之備錄行遣徒
有惑亂都無所益臣欲乞今後應有臣寮等起請刑名
並委法寺及三司等處同共檢詳編勅果有未備即於
門目內意相附近處添減裁定明言於某條內添減計

若干字或是創立新條亦明言於某條後添入一條計若干字其衝改者即云某條自某字至某字計若干更不行用然後奏請頒下諸路便令諸州軍於編勅內添入逐件事節訖奏其先行下自降嘉祐編勅以後續降散勅亦乞委法官將逐件事節與編勅相參重行刪定候了畢日依此頒行仍明言多少條件各合附在某門目中或增減或衝改別立條目共計多少事件若干字數分明別白頒降諸路使州郡用法知所適從免令法

吏檢坐之際有所隱漏致出入刑名其散勅即乞更不行用所冀三尺之法無前後之差畫一之規載清靜之美寔治道之所先急者也

奏乞那移諸路有剩常平廣惠倉錢斛赴府界

臣伏見先朝置廣惠倉別貯天下戶絕田土夏秋租課准備冬後救濟闕食貧民其仁恩至厚然天下土地有肥瘠故所收錢斛多少不等以此多處常有餘而少處常不足致朝廷之恩未得均遍臣訪聞江南東西淮南

兩浙等路州軍見在斛斛多處每州至三二萬石並是
粳米仍有見錢在外兼逐年俵散數目不多契勘府界
諸縣戶絕租課昨准朝旨平估價例令人戶於府司送
納見錢充濟四福田院貧子支用外去年十七縣廣惠
倉見在斛斛共只有八千餘石仍多是穀豆雜色依常
平俵散亦有不足處况值昨來荒歉諸縣鎮鄉村凍餒
之民甚多見今官中散俵粥米日計不下數百石雖近
蒙朝廷降到空名祠部召僧行進納錢斛相兼賑濟故

目下貧民得以充哺稍不失所然而豐荒常數不可前
知萬一將來夏秋重罹不幸計今所餘必不能接濟誠
不可不預為准擬也臣欲乞朝廷特賜指揮江淮等四
路提點刑獄司契勘轄下諸州軍廣惠倉見在錢斛除
本路見有飢歉州軍須至那移應副賑濟并更約度量
留合要準備數目外其餘剩數錢斛並令擘畫附搭發
運司綱運般載上京委提點司俵散闕絕縣分收貯以
充廣惠之數或慮斛斗重滯猝難般運即乞令逐州出

糴見錢附綱前來就近擘畫收糴斛斗損彼有餘助此不足則遠近之民無不畢被朝廷之惠也

奏乞體量放稅

臣伏見開封府界諸縣見有人戶披訴旱灾舊例本府奏乞朝廷差官同本縣知佐依條親詣逐戶田段一一檢覆臣累曾密切體訪得委是旱損苗稼甚多其低下曾得雨處雖有薄熟亦所收無幾况鄉民見各候雨布種秋田若更勾集祇應檢覆誠恐有妨農事畿甸之民

所宜朝廷倍加存恤臣欲乞特降指揮今來所差官許
令與當職官一員只於諸縣逐鄉村體量蠲放苗稅更
不親詣逐戶田段所冀行遣簡便不至勞擾

蘇魏公文集卷十八

欽定四庫全書

蘇魏公文集卷十九

宋 蘇頌 撰

奏議

奏請考校知縣縣令盜賊為殿最

臣伏觀條制約束捕盜官吏至為嚴密而鄉村盜賊未甚衰息及不盡敗獲者蓋由賞罰止於巡檢縣尉而不及知縣縣令故也臣以為巡檢縣尉但能捕盜而不能

使民不為盜若知縣縣令則其職在按察所部無所不
統使之肅清一境勢不難也竊觀今天下縣邑有得人
處徃徃預為條教暗設方略既備之有素則姦宄無能
措手縱有竊發終亦為之擒擿其因循之人則不然見
責任所不及至有以盜賊為非已職事而不留意故奸
黨得以容隱重為鄉村之患者良為此爾臣謹按考課
令每年尚書省諸司得州牧刺史縣令盜賊多少並送
考司是古之長吏有考校盜賊之明文近世遂廢其法

甚無謂也況今州縣場務課額稍虧官佐猶不免累豈
良民罹剝劫之害而親民之吏獨不任其責乎臣欲乞
朝廷下審官院流內銓共加詳定自今知縣縣令任內
遇有強惡賊盜并獲與未獲並即時批上印紙歷子候
成考或罷任日校其殿最量立賞罰如此則當官之人
各知儆勸制盜之本斯亦一端

奏乞糶官米濟民

臣竊聞近日甚有近北災傷人民流移往隣路州軍逐

熟尋有朝旨下諸路令州縣常切存恤恭惟聖恩溥施
靡所不逮然恐州縣拘文不能上副仁憫之意何則流
民所之惟是歲豐物賤便為安居之地今並淮諸郡雖
稍登稔若食口既多必致物價騰踊萬一將來秋成失
望漂泊之民未有歸業之期坐食貴穀便見失所彼時
須煩縣官賑救為惠差遲則其敝益甚矣臣以謂存恤
之法莫若先平物價欲物貨之平則莫若官為糶給使
之常食賤價之物則不覺轉移流徙之為患也臣欲望

特降朝旨應有流民所聚州縣權將上供或軍糧米斛
比見今在市實直量減分數估定價例將來更不得添
長專差強幹官一員置場出糶直候流民歸業日即罷
其約束事件並依昨來在京糶場施行收到價錢却委
轉運司和糶斛斗充數如此擘畫比之出粟賑濟所費
寡而所惠溥惟朝廷垂意幸甚

論東南不可弛備

臣伏以杭州東南要藩控壓江海鈐轄司總領一路兵

甲賊盜公事其間郡縣皆邊江湖萑苻嘯聚蓋常有之
而人情輕揚易為搖動當平居無事之日尚須隄防況
值歲時不易編戶失業者多盜賊乘間伺隙可不預為
之備耶臣竊知向來有南京曹鄆州廂禁軍三五指揮
在彼駐泊前年盡已抽歸將下未曾添填或聞近日亦
曾差撥前去猶未及元舊人數臣欲乞朝廷因此災傷
盜賊稍多之際特賜撥那近郡廂禁軍三數全指揮往
彼駐泊委自鈐轄司常切體量本路如有羣黨盜賊州

縣力不能制者立便相度人數差撥應副協力捕捉免致展轉結集騷動州縣

奏乞開修破藏口復三堂分殺黃河水

臣伏見河決小吳繇澶魏恩冀瀛滄諸州乾寧軍境內北流至界河東折入於海詔旨順水所居使為河道不復修塞決口此誠治河之上策而千古之大利也竊聞水官行郡縣圖方略但欲循水繕營防竭而未議下流函納之利害臣詢諸道塗之言以謂向之東流自澶淵

至鹽山皆獨行不與諸水雜隄防甚遠猶或時有溢溢之患今既北行則與御河胡盧滹沱并合其在恩冀之間稍自成川則無復為害下至五遷渠數道皆合於徒駭俱入御河直注乾寧軍界只有木門樸樁劈地三處通流界河而界河河道亦不甚廣闊既受衆水必須壅遏難行見今滄州界御河增減不常時或逆行乃下法不快之驗明矣即目未甚湍猛而乾寧軍已告危急異時萬一秋水暴至界河疏泄不迭則滄州御河亦恐泛

濫為患宜乎預為之慮也臣竊謂治河之急最在先度
下流之勢大禹釀二渠播九河是也漢之議者所謂多
穿漕渠以分殺水怒太宗朝案河使者劉錫趙孚等亦
曰治隄防不若分水勢近年興二股之論皆其例也今
濱滄州乾寧軍界乃古渤海之故地而大禹九河之下
流自漢迄今皆為大河所經歸海之路雖數移徙而不
離此境其勢使然也臣竊見滄州東北有三堂泊縱廣
皆百餘里下連海道地名黑龍港自來停瀋濬流以為

塹限近歲隄防失完見已淺涸但為汙瀦葭茨之地其
西與御河破藏口及范橋鎮相去不過三五十里可以
分引河流東注泊內既滿溢則由黑龍港以入海其勢
甚易臣在任內先曾差官相度方議奏請尋以解罷未
果上其事今若稍興工開治以為河道決水入泊緣泊
隄防有缺壞處更加增築以限積水此功一成不惟可
以紓滄州御河泛溢之患兼得塘泊瀰漫足壯北道之
形勝欲乞朝旨下水官相度可否施行

奏乞修疊京北驛路

臣近經過京北韋城長垣祥符等縣界多有積水衝注道路五七步至百十步泥淖沮洳往來車馬阻滯甚多蓋由官司拘文非時不敢輒差人夫是致因循如此臣竊謂三代之時諸侯之國道有穢第川無舟梁識者猶以為譏方今封域萬里皇華四達蠻夷面內藩方職貢皆由此塗而出若使行李阻礙亦有司之失官也夏令曰九月除道十月成梁皆所以便行旅而使無病涉也

近制秋夏稅賦輸納之際亦常舉行治道路修橋梁之
令此皆民事之先急當官者宜為之預慮也臣欲乞特
降朝旨下開封府界提點司指揮諸縣那官檢視道路
應有水積泥淖阻滯處並許量事差遣人夫如法修疊
須令高廣使往來者兩不相妨其係溝河通流舊有橋
道處即官中支破材植重別創造務要壯實可行車馬
候了畢日令佐常切提舉遇有損壞立便完葺其外處
州縣亦乞下諸路轉運司依此施行如此則四方載乘

負擔之人無不均受其賜也

奏乞重立不以赦降原免條約

臣伏觀不以赦降原減條勅因慶厯中殿前馬步軍司并開封府奏請軍營家口作過將欲敗露便即逃走指望赦恩即來陳首皆得原罪自此遂有雖會赦降不在原減條臣昨知應天府日有宣毅軍人家口犯在登極大赦前以百日限內不曾首後來改嫁又累經赦恩及德音減降近方事發勘結成案有司拘文不敢斷放臣

與僚屬商議以其曾經大赦難為却科決十年前所犯罪名尋已別作施行訖伏詳元起請本為倚赦作過之人情涉蠹害須當戒勵及後來因事續降條勅亦多此比臣愚竊度恐不謂再經赦宥或非時減降皆不得原減且再經赦宥動須累年冒犯之人容其追改非時減降豈可預期而指望釋放哉諸如此類若皆不與原減是無知之人一時犯罪偶未發覺則畢生負累雖欲改悔其路無由恐非朝廷原情立法之本意又慮法意當

然有司不能盡曉未免使人枉陷深文欲望聖慈許下
刑法寺重加詳明諸稱不以赦降原減條並謂犯事後
遇赦降自當依法施行若事發或未發間再經恩霈並
許依例原減如此則德澤所施蒙恩者廣愚民抵冒得
以自新

奏乞增修南京大內

臣伏以南京國之東門當吳楚閩越舟車走集之會蓋
周之橐內而周之北門也自建都迄今六十餘年人物

風流一時甚盛而宮殿城闕都未修崇惟大內正門以真宗皇帝車駕巡幸曾駐蹕於此肆赦觀酺因賜名重熙頒慶樓當時雖稍完飾然猶是雙門不改列郡之制內中只有御製詩碑亭子二座外更無屋宇俱是榛蕪非所以尊藝祖肇基之邦慰都人徯望之志也臣伏覩大中祥符七年建京制曰可陞應天府為南京正殿以歸德為名即以牙城為大內尋降圖修造事雖頒下即未施行天禧中知府王曾相度減省舍屋別具圖進呈

乞行營建景祐中知府夏竦韓億相繼奏請乞改內前
正街中隔城祥輝門及正南外城崇禮等門皆作三門
適值歲時不稔并以陝西事宜未暇及此然亦逐次降
朝旨令候豐熟日奏取指揮嘉祐中知府張方平亦曾
經畫得旨只是修葺過祥輝崇禮二門餘尚仍舊臣近
叨守鑰目覩其事闕門摧側棟宇隳頽蓋由守臣失於
檢舉欲望聖慈頒命有司令討尋王曾等所奏再行相
度酌中制度修葺歸德一殿并前後門四面軒廊仍改

正門為三門大約不過一百餘間度其所費亦不甚多
若自京師事材場八作司般輦事造了材木量差工匠
役兵等逐旋修葺亦不至勞擾若謂間架稍多難為遽
辦即乞只降指揮應天府支破係省錢赴京西木場收
買材植先且修葺內門令稍合闕廷制度候工畢日漸
次經營崇建殿宇等二三年間便可就緒庶幾興王舊
都稍為壯麗近圻別鑰得以尊嚴表式四方事體誠重
奏乞差防河將副

臣伏以南京府城兩縣一鎮正當汴路教倉營壘官守
民居夾河萬家最為繁庶舊例每遇汴流泛漲即差府
縣就糧禁軍防河本處兵官自當總轄近以諸軍皆隸
將下兵官更不統領准條沿汴合差防河兵級逐將依
舊例權暫差撥即不言統領之官臣昨知本府日值汴
水泛漲尋牒逐將下差撥兵級上河而本將官以別條
非本職事不得差委勾當逐官亦不得承受本條又無
部領明丈其差到兵級連夜在外將官皆不敢往前照

管竊緣府縣地分約二百餘里兩岸擺鋪不下數千人
並無兵官管勾誠慮曉夕暴露失於提振深為不便臣
欲乞今後如遇防河差出將下兵級許依賊發火起條
逐將下那將副一員上河往來巡覷所冀軍旅在外稍
得整肅臣所起請只是乞令將副巡轄差出防河兵級
即不衝改前後條貫亦不妨本處訓練等事

論制科取士乞加立策等增取人數

臣伏觀今年四月戊申及七月乙卯詔書復置賢良方

正能直言極諫科并立定策入三等四等次推恩條制
有以見陛下勤求俊良樂聞讜論士之抱術略懷憤懣
者當繼踵而赴詔矣然臣竊觀本朝故事制科程式太
嚴取人太窄自真宗以來每舉中第者多不過三人少
或一人至有全不收者使豪傑之士有老於科舉而不
預甄擢恐非朝廷聽言求士之意臣謹按漢文二年始
詔舉賢良時對策者百人而晁錯為上第武帝元光五
年詔舉對策者亦百人而公孫弘為第一歷代沿襲廢

置不常至唐而特盛每遇親策賢良等科中第者常不
下一二十人建中元年姜公輔等二十五人貞元元年
韋執誼等一十七人四年崔元翰等一十七人十年裴
垺等一十七人元和三年牛僧孺等一十五人長慶元
年龐嚴等一十五人寶曆元年唐仲等一十九人太和
二年裴休等二十二人自餘幽素將相等幾數十科取
人亦衆其得士若蘇瓌蘇頲父子張說張九齡韓休裴
垺楊綰崔羣韋處厚姜公輔牛僧孺元稹裴休輩皆出

此選卒為輔弼名臣此外奇才博識之士垂名於後者不可勝數信乎制科親策可以收攬英俊有補於治道也而當時應詔之人或命州郡薦舉或許上書自陳被召者徑赴御試其推恩等第則第三等中書門下超資與處分第四優與處分第五等即與處分由是言之程式蓋不甚嚴而推恩亦不甚厚至周顯德四年始詔逐處州郡依貢舉人式例別試解送尚書吏部量試策論三道共三千字內取文理俱優者方得解送上都本朝

之制又加以六論或試於中書或試於秘閣合格方得赴御試其所試論題務求深奧每舉轉加艱難致合格者少蓋以推恩過厚故取人益艱況國家承平日久天下學士陶染風教競習藝文而應此科者尤號該洽其程文縱非優長未合上等亦皆於古今義理潛心有素若蒙采收施之為政必須優於專經之人不為無益於朝廷也臣竊謂今來既立定策等推恩有厚薄則所取亦宜稍加人數臣愚欲望將來或請應人稍多即乞優

加分數如合格人少即乞更加第五等分為上下入此等者只依進士第二甲第三甲注官亦不為徼倖若恐更添入流之人即乞以進士諸科御試不合格人數留充制科數目彼此通融俱無所礙如此則四方特起之人咸有榮進之望聖世搜揚之路蔑有壅蔽之嗟矣

蘇魏公文集卷十九

欽定四庫全書

蘇魏公文集卷二十

宋 蘇頌 撰

奏議

請詔儒臣討論唐朝故事上備聖覽

因臣寮上言請留意近代典故遂詔儒臣檢討唐朝故事日進五條曾未暮歲省閱迨遍嘗聞德音宣諭近輔以為有助聽斷臣伏見陛下祇紹先烈勤勞萬幾治理

之間多用仁宗故事外則邇英講讀經史內則臣寮進獻封事古今得失之迹忠賢治安之策固已溢黠聰而積淵慮矣而臣愚管之見猶有所陳者誠見陛下稽古奉先之心孳孳不怠故敢復僭越而盡言也臣聞之荀卿之言曰道不過三代道過三代謂之蕩言其遠而難信也本朝去唐正同三代其事近而易考所宜宸扆之留聽也臣欲望聖慈特舉慶厯故事詔史官學士采錄新舊唐書中列帝所行之事與夫羣臣獻替之言每日

上奏數事清燕之間特賜覽觀所冀螢燭末光增輝日月臣
不勝惓惓之願

尋詔講讀官不講日進漢唐故事二公每
於逐事後論其得失大旨同列遂以為例

論屯兵漕河大要

臣今月初九日入侍經筵進讀三朝寶訓至咸平六年
契丹南牧真宗皇帝嘗命輔臣條陳禦戎之策因謂宰
相李沆等曰今已屯大兵遼未有隙聚兵廣費民力何
以充給自來建議營田河道多為帥臣所沮臣伏蒙聖
問屯兵漕河孰長臣尋上對以為屯兵漕河二事相須

闕一不可蓋天下無事兵雖不用而邊防武備在乎戍
守則屯兵不可闕也既有戍守必資糧餉積儲糧餉須
由運漕運漕小阻其費百倍是漕河不可闕也方契丹
連歲繹騷邊城謹備真宗以露師累歲思長久控扼之
術故語及營田設險儲糧贍軍之議蓋為息民止戈之
漸而帥臣不能遠謀但矜甲馬雄盛反以設險為示弱
故李沆又陳功之難成蓋人人互執所見參驗而行寔
為至便欲望聖斷決行是後雖與契丹講和然而運河

營田終亦不廢至今沿邊以為大利又國家禁旅大兵多駐沿河州縣皆取運漕之便也臣故曰屯兵漕河二事相須闕一不可臣退而伏思聖問淵奧皆經國裕民之先務臣前對疎淺不甚周悉輒復稽考書傳所載前世已行之事進言其一二仰備聖覽臣聞古者內諸夏而外夷狄故有侯甸要蕃之限祭祀享貢之令蓋異遠近而別夷夏也遠人不服則侯伯之國得以文告而懲艾之故文王命南仲伐玁狁城朔方而玁狁于夷宣王

命召公平淮夷至江漢而淮夷來獻此攻伐征討之備
素具故也秦并諸侯天下混一而強胡未服始皇使蒙
恬將兵攻取疲敝中國卒無成功此無外禦之所致也
韓安國將兵屯漁陽上言方佃作時請且罷屯罷屯月
餘而匈奴大入上谷漁陽掠其人畜而去此失備虞之
所致也自爾以來中國未嘗無戎狄之患郡縣未嘗無
戍守之役千金之費歲月相乘由是轉漕運糧之策興
焉秦使天下飛芻輓粟起黃腫

直瑞反
又音誰

琅邪負海之郡

轉輸北河率三十鍾而致一石

六斛四斗為鍾計道路所費凡用百九十二斛

乃得一石止

卒困民力漢守滎陽軍無見糧蕭何轉漕關中

以給食糧道不絕遂興漢祚此運漕有策與無策相去之萬萬也趙充國擊先零請罷騎兵以步兵萬人留屯要害因田致穀威德並行大費既省徭役豫息以戒不虞唐姜師度守易州始於薊門之北漲水為溝以隔奚契丹之寇又約魏武故迹傍海穿溝號平河渠以避海道運糧者至今賴之此皆屯兵漕河前代之明驗也臣

聞帝王之都必據形勢故三代居河洛之間漢唐宅咸
洛之壤我太祖皇帝嘗愛洛陽山川之勝始有建都之
意用軍校李懷忠陳汴渠運漕之利遂東還京師此實
聖斷睿謀因時適變貽萬世之長策今京師有汴蔡廣
濟轉輸之饒沿邊有塘灤營屯之固鎮壓夷夏踰於金
湯非三代漢唐之可擬倫也臣頃在先朝竊聞今太子
太保致仕張方平嘗蒙神宗顧問汴渠興置利害方平
奏曰古者建國必依山川今國家都汴實據平夷之地

所以為形勢者禁旅也資禁旅者粟帛也所以富粟帛者汴渠也望戒有司以時開塞毋輒輕議天下幸甚神宗深以為然審此言亦可見屯兵漕河之大要也臣愚僭易開陳庶幾上裨聖政之萬一

議疏濬黃河

臣竊以方今河北之患莫大乎河流未復故道冀瀛之間民被其苦者多矣雖朝廷遣使臣僚建議而疏塞之策未聞定論臣元豐四年知滄州日正值河決小吳北

流入御河直注界河同入於海當時詔旨順水所居便
為河道不復修塞決口臣在郡日曾遣官按行及詢采
民言以為向之東流自澶淵至鹽山皆獨行不與諸水
雜隄防甚遠猶或時有溢溢之患今既北行則與御河
胡蘆滹沱并合其恩與之間但瀰漫濶遠稍自成川居
占民田未為甚害下至五遷渠數道皆合於徒駭俱入
御河直注乾寧軍界只有木門廣濶既受衆水必須壅
遏難行至臣代還會上言乞先相度下流之勢竊見滄

州東北三堂灤縱廣皆百餘里下連海道地名黑龍港
其灤西與御河破藏口及范莊橋鎮相去不過三五十
里可以分引洪流東注灤內灤既滿溢即由黑龍港以
入於海雖非經久之畫然亦足以紓一時瀛冀瀰漫之
患尋聞事下都水監後來不復施行近者都水相度欲
開孫村口入故道若可行水則用功少而除患多是為
上策矣或聞以地近北京恐有浸溢故議亦未決臣以
謂河流泛濫未有所向災及州郡已五六年若不早為

經畫異時夏秋大水則其患轉深矣臣愚欲望特降朝
旨下都水監及河北轉運司合議孫村口若故道尚存
鹽山海口不至堙漲可以承納下流即速計功開道萬
一以北京逼近及海口堙漲未敢便行疏導即乞重別
相度滄州界御河破藏范莊橋水口增築三堂灤南隄
以限水勢即開口放水由灤入海少寬瀛冀積水之患
使目下居民稍獲安堵然後別行經度久遠之利與其
坐俟河清曷若兩圖以救其患伏望朝廷留意不勝幸

其臣陋儒淺識愚無他長塵黜近班每慙曠職伏遇皇
帝陛下開廣言路博訪在廷敢竭所聞仰應詔旨雖肉
食者鄙非有遠謀而狂夫之言或蒙聖擇僭妄之罪萬
死莫逃

奏乞罷起夫修支家河

臣勘會揚州近得江淮發運司牒准元祐八年十月二
十六日朝旨令發運司總領開修楚州漣水縣至海州
石閘堰下運鹽河并創開支家河要見揚州管下縣分

鄉村等第人戶立定式樣取索五等人戶內有係災傷
去處及出役錢不出役錢人戶等事并放稅分數詣實
供報本州雖已依應施行臣竊見淮南係災傷路分又
得轉運司牒經冬未有雨雪請差官祈求本州自十一
月上旬於諸神寺觀祈禱備至並未有應訪聞民間尚
未下得麥種已是過時來春必是闕食若更起夫役竊
恐民情嗟怨有傷和氣臣伏見朝廷故事每遇災傷之
歲諸色工役並權罷免今來楚海及本路諸處夫役亦非

目下急務欲望聖慈特降指揮下發運轉運司應係諸處夫役雖已得許差朝旨以今來亢旱並且權罷候將來豐熟日再取朝旨所貴人情安帖灾沴自息

貼黃議者或謂

官出錢糧催召人夫豈妨農事臣以為若僱募情願只合出榜招召人自應募今來預行勘會取索鄉村限定人數諸縣必須據數差科雖不願行官司督迫豈得避免如此何名僱召

奏乞減定淮南鹽價

臣伏見淮南一路財賦之數最為浩繁尤藉每歲賣鹽額錢一百餘萬貫資助經費而近歲以來連併不敷議

者咸謂不能禁絕私販之人侵奪公利而致然耳且瀕海之地瀉鹵所生而又宿亳諸州連接京東西通商地分販者不宿昔而獲厚利雖峻以刑誅亦不可禁絕加以私貨美而價賤官貨惡而價貴民間既利於私易則官鹽無由出賣得行往往只是抑配與傍郭人戶及過往舟船如此課額何從而登辦也夫鹽味之於人日食而不可闕者非同茗酤用之有時也以一路生齒之繁食鹽者不可勝計而百萬之課前後登虧不同非昔之

食者衆而今之食者寡也蓋未思所以制其本爾臣竊聞曩時數有建言者欲將一路官鹽設法減價出賣或有欲只減出產州軍價直者臣以謂遠近一槩減價誠未易遽行若且於出產地分通泰楚海州漣水軍及通商隣境宿亳壽泗等州減定使公私之價不甚遼絕則民間樂買者必衆而私販之人自知利薄而重犯法矣苟度越一州而販入他州界則道路潛匿必艱於鄰境官司捕搦亦易為禁止也若行之三數年間課額稍登

然後於近裏州軍一例裁減此誠移私貨增官利之法也

奏乞移屯禁軍於真楚泗州就糧

臣竊見真楚泗州枕江帶淮連接海隅四方輻湊最為繁會其間隱藏奸慝之人固亦不少伺間為盜不可不虞而州郡兵防曠久不講內楚州猶稍有備真泗特為闊畧逐州雖有本城兵士數千人除差出外所存不過三五百人各占色役未嘗教閱其屯駐泊兵士又亦

不多平居無事以巡防坐舖尚或不足一有寇盜何以
枝梧誠宜過為之慮也臣伏見京畿諸縣界及近甸州
郡各有就糧禁軍不少欲乞朝廷相度那移近下軍分
逐州各與三五指揮往彼安泊如遇合該出軍則更互
起發常留一兩指揮在州一則就彼糧儲稍省漕運之
艱二則張大州郡聲勢使寇盜不敢萌窺窬之心三又
可以應援東南諸路緩急討賊之備議者或謂連營久
安重於遷移臣以謂近者揀選逐處兵士遷補上軍其

經揀指揮有少闕人數欲乞令本處相度將殘零兵士併入一般軍分就多依足數目空閒指揮便可廢罷却移此軍額并量差人員往逐州置立營房招填土人充軍仍逐旋教閱候數足則別立將窠如此處置兩無所妨

謚議

司空侍中臨淄公晏殊謚元獻

大理寺丞館閣校勘同知禮院蘇某議曰終官繇三品

而上得以謚易名非特寵貴臣而假優禮將以因卹典而示勸監舉字之美惡視行之賢否至公之道也其法曰主善行德曰元文賢有成曰獻惟二義之美合於故相司空臨淄公之行為宜矣司空神機警異器蘊夙就初起江介已被先帝知獎訓言敦勉許以遠至歷文館登掖垣翼儲闈直禁署寵榮便蕃待遇莫貳聖皇纂嗣注意圖舊乃踐樞極乃贊冢卿出藩入輔垂二十年而至於大任若其操履端固議論誠懇居官任職所至有

聲謹言嘉謨入則造膝辟在近密見謂忠謹如張少儒
居朝位除擬公當若崔貽孫至於好賢樂善特出天性
平生以風鑒自許未嘗用喜愠加人此又人之難能也
故士或被薦用者至有十數年間躋顯塗置廊廟若故
范文正實同列台司孔給事嘗代為御史又稱今觀文
富公於上使報隣聘亦不以親疑為間昔胡廣與陳蕃
並為三司漢史紀之謝安引從子幼度往備北陲晉人
為善焉較之前良在我無愧可謂能知人矣公不私矣

始以文藝自著資適逢世進官早成遍歷華要總幾宥
登宰府持憲綱主邦計爵祿名數極矣而處之若無有
也遇事持正動循規準不為勢怵不為利回篤志文史
老而益堅作為文章蹈道自信蓋得四教之忠信三德
之剛柔禮之中和詩之溫厚傳經義以飾行事宜乎遭
會兩朝大節無玷可謂能保躬者矣有始卒者矣夫委
質入朝當政任事有知人之明而濟以不私得不謂之
主善行德乎保躬而由禮則行己而有始卒得不謂之

文賢有成乎前考功狀司空功閔且告葬期請以元獻
謚謹議

贈太師王嗣宗謚景莊

殿中丞充集賢校理同知禮院蘇某議曰太師少以雄
雋聞於時起徒步舉進士會太祖皇帝收攬天下才傑
之士始就便座親策詞藝而太師以文章應對稱旨擢
在第一初仕州掾則有強濟之舉數以言抗上官上官
不能屈時人固以奇才目之累守藩要更使別部咸有

能績其最章章者若說崔翰用兵摘甘陵謀卒禁淮南
窄神去幽土妖狐皆明識所照人以蒙利景德祥符間
种放以隱遁自高先帝屢詔敦迫留置儒館以有道禮
之予告歸終南朝之公卿大夫希風仰高歌詠相繼時
太師守雍獨謂其賈名過實獵取爵位豪斷鄉里豈退
士之節也歷疏詆之言極切至詔放徙嵩山以避之其
在朝廷風采尤厲任御史日請問言事繩糾在位無所
顧憚及贊樞筦力陳致治之要上頗開納又論折權貴

不容私間當時或詆其矯激太甚而太師處之沛然
不疑嗚呼古所謂正色立朝者豈近是夫惟春秋之義
著媿惡以勸來者國朝之制視爵秩以易其名在書有
之布義行剛曰景嚴恭臨民曰莊若其事上無隱強而
能斷得非義且剛乎布政持法人不敢犯得非嚴且
恭乎即是懿行合諸前典太師無媿矣請謚曰景莊
謹議

駙馬都尉贈右僕射王貽永謚康靖

殿中丞充館閣校理同知禮院蘇某議曰中令以名家
子出綺紈中性若少成卓然有立刻意墳史志尚恬夷
不以門閥自高思與英游共驚藹乎令聞見於士評章
聖皇帝雅知其賢特所稱激屬王姬築館甲族求儷衆
歸清雅之範乃膺選尚之恩自茲貴顯日隆眷待尤異
內外使領多歷煩要時以珍符薦錫鑾輅四巡陪護王
遊顯相儀則在帝左右見謂忠恪今上續戎謨烈圖任
勲賢薦付節旄更委符竹所至之郡皆名雄劇以條教

率下以慈惠及物人用懷畏號為吏師再朝京師留筦
樞宥當本兵之地通執政之司簡在上心朝夕納誨外
強戎索內輯軍和敏於敢行不陂不倚深籌密畫時多
賴焉慶厯中夏戎款歸與講成算皇祐間儂蠻騷嶺參
受伐謀功成不居謙畏益甚名遂能退識量彌高歸全
考終一節無玷謚法曰安樂撫民曰康和德考衆曰靖
議者謂中令以帝姻之貴樂民政之勤方時治平尤重
外守領鎮十數美聲沛然得安樂撫民之義贊燮機務

垂十五年循晦遠猜不怙權寵雖據要地人無間言非
和德考衆疇能及是有司告葬禮有易名旌勸之典惟
至公是徇伏請謚曰康靖

贈右僕射高若訥謚文莊

大理寺丞充館閣校勘同知禮院蘇某議曰僕射純學
懿行著於州里顯於朝廷而稱於士大夫其為御史也
摧詆倖進不顧權威疏論大慶外朝憲章法度之自出
不宜集緇黃輩廣為供會請沿唐開延英故事進見輔

臣使得從容坐論以究治道及在政府惠州郡兵冗稍
草招募之法病文武官濫極陳泛遷之弊又傳丞相言
斜封徼恩一切願罷外戚肺腑不可預政皆具為令王
守忠叙遷岐路以求節鉞白以家臣其將用將帥之禮
處之邪騫永濟坐法黃緣欲覬牽復乃引受賕須臾赦
還官格以沮之奏議恂恂劇切於上主可於行而不主
於激訐所務周密畏人聞知故其謹言嘉謨時多不得
而傳自始登延閣暨解幾密皆聯職金華日侍清燕接

經據古切於比方上深歎其辯洽歷二府通五期嘗謂
不得其責行當引去會南師凱旋懇章得罷識者謂其
知止足行已清約不喜俗為蹈道自信譽誹如一雖位
為公卿而家若韋布疾且革自云診證垂盤卒不進藥
臨終慮後不以家事譏朝廷時人善其有始卒蓋古所
謂知命君子者僕射其人乎惟易名考行之義稽於典
禮擬諸形容宜擇其稱者謚法曰博聞多見曰文履正
志和曰莊若夫學通古今而長於辯論是為博聞識造

賢達而明治要是為多見值貴倖之勢而抗議毋撓是為履正當功名之途而處之不爭是為志和以一惠之大配二字之美誅茲遺德實惟至公請謚曰文莊

蘇魏公文集卷二十

欽定四庫全書

蘇魏公文集卷二十一

宋 蘇頌 撰

內制

明堂赦書

門下治人莫急於重祭嚴父孰大於配天昔者周公宗
祀明堂而致孝鴻惟仁祖規撫路寢以尊親參合古今
之宜茲謂情文之盡肆我昭考稱秩彛祠周爰羣策之

長專崇一帝之配聖作明述事並功偕稽呂令之文則
享以秋季案曾經之載則日用吉辛允協靈心奉為常
憲朕纂圖宸極承訓慈闈事舉於中禮循其舊嚮講親
祠之制一遵先聖之謨對越上神翕受純嘏五躋來備
三稔於茲屬方隅之底寧嘉河流之順復物無疵癘民用
平康荷穹昊之降休致函生之蒙祉復會一郊之歲前
詢七數之謀而乾象垂文宸覲房心之次朝儀取法是
為政教之宮適及其時茲用展采陳千乘萬騎之儀衛

極四海九州之貢羞皆欲有以致其嚴猶懼無以稱其
德前期戒衆各揚職以盡恭先甲端誠中集虛而思道
始欽柴於真館旋備物於大庭作主侑神帝與親而並
享奠匏及瓚薦暨裸以交行一純罄而高明歆四氣和
而諸福應有司已事祝嘏既告以孝慈與物惟新風霆
爰布於號令式均惠澤溥被敷天可大赦天下云云延
州要藩上郡舊境皇朝建彰武之節以開帥庭先帝寵
王爵之封以賜朕履惟山川之嚴峻本土族之敦龐宜

加府號之稱用旌受命之地延州陞為延安府於戲合
內朝之神事既因錫羨以推仁得萬國之歡心又將使
民而知孝蓋布德行惠者非賢罔乂任大守重者惟后
克艱尚賴文武蓋臣股肱碩輔共底緝熙之治庶成忠
厚之風咨爾羣倫其體朕意赦書日行五百里敢以赦
前事言者以其罪罪之主者施行

麻

太師文彥博加食邑制

門下季秋大享周公之禮見於經三歲親祠國朝以來
著為令恭惟皇祐之制肇崇路寢之居稽參節文舉合
彝典朕通遵先憲祇率舊章奠真祖而款殊庭奉昭考
而配上帝休成熙事爰需澤於多方乃眷帝師預制儀
於前識誕均神貺用獎王勲頒以策書告於朝家太師
平章軍國重事上柱國潞國公食邑二萬七千一百戶
食實封一萬一千四百戶文彥博溫良恭儉明允篤誠
受天純粹而生為國寶求而仕方仁皇之在御得元精

之佐臣四方于宣文武見乎事業一相處內謀猷著於
幾康屢委柄而出藩遂傳家而佚老肆朕纂服渴見儀
形起真拜於上司翼翼成於初政副文母之咨訪慰眇
躬之寤思閔煩以摠職之勞專任以代工之重四朝元
老深有賴於謨明三事大夫皆仰承於矩度屬舉宗祈
之典獲詢肆類之文逮此慶恩久當封於成國徇其謙
請但增數於爰田惟邑賦與真租示褒功而崇德於戲
國有大賚益是富於善人惠于宗公期永錫於難老尚

交修於一德庶終譽於萬方惟竭乃誠同底於道可

皇叔徐王顥加食邑制

門下稽古仁皇肇太室宗祈之典思文聖考奉一天崇
配之祠朕祇邁先猷稱秩元祀侑神作主克崇嚴父之
恭與物惟新因霈自天之澤式孚庭號用顯宗英皇叔
永興鳳翔等軍節度管內觀察處置等使守太尉開府
儀同三司雍州牧兼鳳翔牧上柱國徐王食邑一萬二
千八百戶食實封四千三百戶賜贊拜不名顥以族屬

之尊處公侯之上親則叔父爵為真王而德性明誠行能純備孝友內著靡待喬梓之觀言動有常不越宮壇之表而自苴茅建國列邸奉朝名位並高親賢莫貳建雍岐之雙節奄鳧繹之大邦正考之三命益恭顏淵之一善弗失惟詩書是好非禮義不談得先秦之古文幾同漢室識前朝之舊典莫如東平所謂邦家之翰垣宗室之儀表永為藩輔上奉母儀比稹禮之休成錫純禧而均被告於列位寵以徽章增命數於王家廣土田於

邑戶仍於書詔賜以不名於戲積厚者流光雖自文昭
之慶位高者禮異抑由王行之賢茂對明綬之恩益增
磐石之固可

皇叔祖華原郡王宗愈加食邑制

門下國家六聖貽謀百年制禮在我昭考崇奉親配帝
之儀逮茲眇躬思繼志述事之訓永惟大享之報適協
季秋之中時其宗尊實相熙典奉璋在列儼乎陟恪之
容渙汗均休厚乃褒優之命皇叔祖寧國軍節度宣州

管內觀察處置等使檢校司空開府儀同三司持節宣
州諸軍州事宣州刺史上柱國華原郡王食邑七千八
百戶食實封二千四百戶宗愈天資渾厚躬服謙撝地
承帝室之華系衍王家之慶其言甚大深知樂善之方
力行有餘常事學文之語自先朝之睦族首同姓以分
封列郎留朝久席王侯之寵擁旄拜衮復兼將相之崇
處貴不驕好禮有立方其與祭之日能謹事神之難雖
百執盈庭皆奉各揚之職而三獻成禮允資終事之勤

不有異恩曷彰懿行是用因美原之故壤即宛陵之大
邦再徹土田並增邑戶醕勲之典有國所先於戲歌我
將之詩克昭先烈流祭澤之廣用獎親賢祇荷厯鴻之
休益思寅畏之戒永保天祿克終令名可

皇叔祖安康郡王宗隱加食邑制

門下天載無聲雖備物不足稱其德父尊莫抗非陟配
何以昭其功故仁祖所以躬太寢之祠神皇所以專一
帝之奉逮此三年之報率遵二聖之謨奠玉裸圭既畢

儀而升燎垂纓委佩多顯相之在庭宜舉慶條首褒宗
戚告於朝家用廣神休皇叔祖保信軍節度使廬州管
內觀察處置等使檢校司空開府儀同三司持節廬州
諸軍事廬州刺史上柱國安康郡王食邑七千八百戶
食實封二千一百戶宗隱挺質端良處躬循謹行天源
之流潤為邦族之尊宗早分列郡之封位兼王爵繼荷
陟壇之拜秩視公台執禮不愆樂善無厭經籍文史常
置於巾箱車馬輿臺不踰於科品有大而能謙必豫位

高而受命益恭屬禋祀之慶成推渙恩而自近井田真
食保增錫於戶封將相重侯故優崇於命數酬勲有典
賦祿非私於戲天祐我家宗戚固多於賢懿祭有大澤
寵章寔異於等倫勿替兢修以永終譽可

皇弟大寧郡王佖加食邑制

門下朕歷吉季秋歲事太室尊聖考而配上帝克盡孝
誠祈厚福以浸羣元式孚渙號惟予介弟時乃宗英早
緣帝子之恩已開爵土今拜大神之貺宜峻等夷皇弟

山南東道節度襄州管內觀察處置橋道等使檢校太尉開府儀同三司持節襄州諸軍事襄州刺史上柱國大寧郡王食邑六千戶食實封一千九百戶佖擢秀天枝分暉星采生知忠孝跬步不忘於君親夙慕善良比年已習於弦誦爰自勝衣趨拜擇日受封擁漢沔之節旄宅吉陽之疆土已崇上衮益知偃僂之恭雖處深宮如臨師保之敬屬精裡之竣事敷惠澤以均休爰即舊封薦加優命增以轅田之賦衍乎真食之租誕告大庭

式揚熙霈於戲大事在祀執膳所以惠諸侯宗子維城
懷德所以固寧宇思處家為善之樂知制節謹度之宜
期底大成無違策旨可

皇弟咸寧郡王侯加食邑制

門下朕承列聖之休光荷文母之慈訓追養繼孝感時
念親交於明神展嚴父配天之禮友于兄弟厚同氣異
息之恩屬茲慶賜之行首舉懿親之命告於庭家布乃
言綸皇弟定武軍節度定州管內觀察處置等使檢校

太尉開府儀同三司持節定州刺史上柱國咸寧郡王
食邑五千戶食實封一千七百戶侯岐嶷之姿見於幼
惠溫文之美有若夙成勝衣乃拜於官封授策已兼於
將相未就外傳字書已習於奇觚早肄少儀行步不踰
於佩玉適邁禋祀之慶進加命數之崇稽案舊章誕頒
徽典擁節旋於新樂不改故邦廣國壤於宜川再隆異
渥戶田加賦幹食增封寔均神貺之孚益重天倫之愛
義兼敦睦恩越等威於戲祝嘏既告以孝慈成予精享

公侯以為之藩屏繫爾懷寧惟詩禮可以飭躬惟仁義可以保國勉思遠度無忘訓辭可

保康軍節度使苗授加食邑制

門下行莫大於孝孝以尊親為先祭則致其嚴嚴以配天為重朕欽承謨烈昭事穹昊歷季秋之吉辛躬三歲之大享樵蒸焜上既接禮於明神裸將于京遂昭功於聖考迨茲竣事推以渙恩褒嘉元戎亶揚丕命保康軍節度房州管内觀察處置等使檢校司空持節房州諸

軍事房州刺史上柱國濟南郡開國公食邑三千三百戶食實封五百戶苗授天資端厚性溫沈雄傑然師帥之才奮於州縣之職干戈衛社隱若敵國之堅談笑臨邊噓無武將之體冒犯矢石保守封疆先帝知其才謀委成戎閫前歲召於邊徼入長殿廬謙而有光寵至益戒以疾屢請辭劇彌堅解蘭錡之親兵領關陜之重鎮精裨既戒祭貢預慶熙典克成寵章載錫加數邑田之廣衍封幹食之多褒命非私疇功惟允於戲聽鼓鼙

而思將帥予不忘於舊勲守富貴而和人民爾宜圖於
遠畧祇服明訓徃惟欽哉可

駙馬都尉李瑋加食邑制

門下朕祇遁先謨欽崇神事惟天惟祖宗之數祐敢忘
報本之恭以禋以肆獻而展儀期盡克誠之享粵在秋
旻之季載嚴宗祀之文汔盛禮之休成賴庶工之助相
嘉與勲戚同茲慶欣平海軍節度泉州管內觀察處置
等使檢校太師持節泉州諸軍事泉州刺史駙馬都尉

上柱國平原郡開國公食邑六千七百戶食寔封二千
四百戶李瑋系出王門行如素士早厭紛華之習樂為
名教之修仁皇以舅家之親降虞嬪而欲貴先帝以外
戚之屬授漢節以隆恩而志不期驕動必由禮日恪位
著奉昕朝而不違言敦詩書務時敏而有裕試守嘗更
於方郡雅意蓋在於本朝侍合宮之祠能罄齋明而涖
事推大澤之霈宜優禮秩以均禧仍榮戟於泉山廣土
田於安德戶封真食併用旌酬於戲神明之休詎菲德

之專享爵祿之馭非有功者不承矧予舊族之賢夙稟
教忠之訓不愆素守自保全名可

西蕃邈川首領阿里骨加食邑制

門下祭有十倫之義施爵賞以為先福者百順之名本
忠孝之自出朕祇祓陽館崇嚴禰宮配神穹昊之尊流
澤幅員之廣嘉與卿士同茲慶休便蕃優渥之恩固無
內外之異告於朝案布乃言綸西蕃邈川首領河西軍
節度涼州管内觀察處置押蕃落等使金紫光祿大夫

檢校太保持節涼州刺史上柱國寧塞郡開國公食邑
四千戶食實封一千一百戶阿里骨生有軼材少負偉
略稟天地之義氣得秦幽之遺風奠塞外之封疆繼承
列土擁河西之旄鉞坐護諸羌長雄一方作我西屏屬
九筵之講禮盛四海之駿奔來獻其琛實相予祀是用
加命王公之數視秩帝傳之崇增井賦於爰田廣國租
於真食於戲爾有時享歲貢之恪史不絕書我有餒神
觀政之方惠必及下既均承於純嘏宜益厲於忠規往

服訓言克享天祿可

南平王李乾德加食邑制

門下朕稽五禮之文躬三年之祀歷吉季秋之序薦誠
太寢之居嚴父配天既克成於能享加地進律用褒寵
於有勞乃眷藩臣越在嶺表特推頒於優渥俾共介於
福釐推誠保節忠亮同德順化翊戴功臣靜海軍節度
觀察處置等使特進檢校太尉同中書門下平章事安
南都護上柱國南平王食邑九千戶食實封三千四百

戶李乾德氣稟溫仁志抱忠義席世芬於南國遵侯度
於中朝扞城其民奄奠朱戴之域要服者貢遠輸南海
之珍自分王爵之封專擁將旄之貴寵章所被嘉欣戴
以彌恭疆場無虞本綏懷之有裕爰舉宗祈之澤薦加
命數之崇視秩三司增封千室兼厚真租之數併酬保
境之功於戲導揚神休自京師而及於諸夏保守土宇
和人民而莫若勤王益厲乃誠永錫爾祉可

蘇魏公文集卷二十一